

## Saho Carta Que Dicjin Pedro

*Pedro rroanha joajna ngain chojni judío que ditticaon Jesucristo co teha ngain nacioen*

<sup>1</sup> Janha Pedro na, janha ná representanté Jesucristo. Cjin na carta jihi para ixin jaha ra xó judío ra que teha ra ngain nontteha ra co ditticaon ra Jesucristo; jaha ra xó te ra ngain nonttehe Ponto, nonttehe Galacia, nonttehe Capadocia, nonttehe Asia, co nonttehe Bitinia. <sup>2</sup> Jaha ra tti Dios Ndodá na coinchiaha ra desde osé tiempo vatto para que sintte ra chojní jehe Ndo. Co Espíritu Santo joincheroa ansean ra para que sitticaon ra tti coetonha Dios, co para que cain tti jianha que joinchehe ra oxenga hna conixin jní Jesucristo. Dios rrochjá ra tsje tti jian co tti čhjoin que tsonohe ansean ra.

*Tti vida naroaxin que xonhi tiempo tsjexin*

<sup>3</sup> Ján na sonttocoanxinhi na Dios Ndodé Jesucristo, tti chonda cain joachaxin para ixin ján na, ixin Dios mé tti coiaconoá na, mexinxin chjá na vida naroaxin ixin jehe joinchexechon Jesús. Co jehe joinchehe jañá para que ján na rrochonda na seguro ixin sonttechon na ngain vida naroaxin para cainxin tiempo. <sup>4</sup> Co jehe Dios rrochjá ra tti herencia que jehe jittenchjinha nttiha ngajni, co cosa mé čhoha rroxantte ni čhoha rrochonda mancha, ni rroxentteha inchin tsjo. <sup>5</sup> Co ixin jaha ra ditticaon ra Dios, jehe jinda ra conixin joachaxín jehe para que sayeha almá ra castigo.

Co cosa jiji jaha ra sicon ra ngain último tiempo are ochiaon ndatsjexin mundo.

<sup>6</sup> Mexinxin jai jaha ra anto chaha ra, masqui puede chonda que nchion tiempo jaha ra atto tangui tetonha ra. <sup>7</sup> Ixin chonda que jamé tetonha ra para que nchao xago ixin jaha ra ndoa ditticaon ra Jesucristo. Co cai oro, masqui chonda que ndatsjexin, pero tangui tonhe are xotte ngacjan xohi para que chojni dicen si ndoa jian oro. Pero tti jaha ra ditticaon ra, mé icha rentte que oro que ndattjexin. Mexinxin chonda que anto tangui tonha ra para que xago si jaha ra ditticaon ra jian ngain Jesucristo. Co si jaha ra tsixinha ra cain cosa tangui yá, jiquininxin que Jesucristo rronichja jian de ixin jaha ra, co anto sinttasayaha ra are jehe tsí iná.

<sup>8</sup> Jaha ra rinao ra Jesucristo masqui xonhi tiempo vicon ra, co chonda ra confianza ngain jehe jai masqui diconha ra. Mexinxin jai jaha ra anto chaha ra que hasta ni choha rronichja ra de ixin quexén chjoin tonoha ra, <sup>9</sup> ixin jaha ra ochonda ra vida naroaxin ixin ditticaon ra Jesucristo.

<sup>10</sup> Ngain tiempo are saho, profeté Dios anto cjoé ngain tti jitaxin Palabré Dios, co coangui jian para rroquinxin de ixin tti jaha ra ditticaon ra jai, co vanichja de ixin quexén Dios sinchenciaon nganji jaha ra. <sup>11</sup> Espíritu Santo, que rroanha Cristo, vanchenohe profeta desde are saho de ixin quexehe cosa tangui tsonhe jehe Cristo co de ixin después cain chojni sinchesayehe na jehe. Co jehe profeté Dios anto joinao rroconohe ixin quensen jehe tti Cristo co quesa rroquí. <sup>12</sup> Pero

Dios joinchenohe cain profeta que tti xa que jehe vanchehe jeha para ixin jehe, sino para ixin ján na. Co cain tti jehe vanichja, mé xajeho tti jian joajné Jesucristo que jaha ra conoha ra después. Co tti chojni que jointtanoha ra joajna mé, jehe na vinttechonda na joachaxín Espíritu Santo que joixin de ngajni. Co cain cosa jihi hasta cain ángel orrojinao rroguintteguicon.

*Dios rinao que ján na sontte na ngain ná vida jian*

<sup>13</sup> Mexinxin, xaxaon ra jian tti jaha ra sinchehe ra co nchegonda ra joarrixaoan ra. Co chonda ra seguro ngain Dios que jehe sinttanchaon ra ngain nchanho are Jesucristo tsí iná. <sup>14</sup> Ditticaon ra tti ndačo Dios inchin chjan jian que ditticaon xan ndodé xan, co ncheha ra cosa jianha inchin jaha ra vajinao ra vanchehe ra are icha saho que jaha ra rroguitticaon ra Dios. <sup>15</sup> Incheha ra jamé, sino que dintte ra ngain ná vida jian ixin Dios que coinchiaha ra jehe jian, <sup>16</sup> ixin ndačo ngain tti jitaxin Palabré Dios: “Jaha ra dintte ra ngain ná vida jian ixin janha jian na.”

<sup>17</sup> Dios tti nchejuzgá tti nchehe cada chojni, co nchejuzgá inchin tequininxin cada chojni. Co si jaha ra ndačo ra ixin Dios mé tti Ndodá ra, jaha ra chonda ra que rroxagonhe ra jehe Dios ngoixin tiempo que jaha ra sinttechon ra ngataha nontte jihi. <sup>18</sup> Dios icoančjandaha jaha ra para xa rroguintte ra ngain tti vida que xonhi xé para ixin Dios, inchin tti vida que jointtacoanha ra nindogoelitoa ra. Co jaha ra noha ra jian que tti vitte vida que chjá ra Dios; xengaxinha hna

conixin cosa que nchao ndatsjexin inchin oro o plata, <sup>19</sup> sino que xengaxin hna conixin jní Jesucristo. Jesucristo ni ná cosa jianha joinchehe. Mexinxin jehe ndavenhe para cjoenga hna cain cosa jianha que jointtoho na, inchin are saho chojni vagoen na coleco para vaganjo na ngain Dios para vaxenga hna tti jianha que vanchehe na. <sup>20</sup> Jesucristo ovequininxin jañá desde icha saho que nontte rroconchjian. Pero jehe xa coenha mé, jehe joiconhe hasta ngain tti último nchanho tehe que ondajittjexin mundo. Jehe joiɣago co conhe jañá para que cjoenguijna jaha ra. <sup>21</sup> De ixin Jesucristo jaha ra ditticaon ra Dios. Co Dios joinchexechon co joinchesayehe Jesucristo. Mexinxin ansean ra ndačo para que ditticaon ra Dios co chonhe ra que Dios jian sinchehe ganji ra.

<sup>22</sup> De ixin joachaxín Espíritu Santo jaha ra ditticaon ra tti joajna ndoa que joixin de ngain Dios, mexinxin jai jaha ra ocoroa ra. Co mexinxin jaha ra nchao rinao ra cain chojni que ditticaon Jesucristo. Jañá chonda ra que anto sinoa chó ra naná ra conixin ansean ra. <sup>23</sup> Jaha ra cjan ra goan ra iná, pero ijeha de ngain chojni de nttihi ngataha nontte ixin chojni mé ndadenhe. Jaha ra cjan ra goan ra iná pero de ngain palabré Dios, co palabra mé tti danjo iná vida naroaxin co tsonchjenhe para cainxin tiempo. <sup>24</sup> Ixin tti jitaxin Palabré Dios ndačo:

Cainxin chojni jeho inchin ná ca,  
co cainxin cosa jian que jehe na chonda na, mé  
inchin tsjohe ca.

Ca ndaxema ca, co tsjohe ca ndadingo tsjo;

25 pero palabré Dios tončhenhe para cainxin tiempo.

Co palabra jiji tti jian joajna que jaha ra vayehe ra.

## 2

<sup>1</sup> Mexinxin, ttinttohe ra cainxin cosa jianha, inchin de tti ncheyehe ra chojni, co tti jaha ra nchehe ra para chojni xaxaon na ixin jaha ra anto jian ra, co ndoaha, ixin ngain ansean ra ojé teŕaxaon ra, co ttinttoehe ra tti joachjoehe para ngain chojni, co tti cain clase de chijni que jaha ndoa. <sup>2</sup> Nchehe ra inchin chjan que nandá toncjiji; ttjé ra palabré Dios inchin jehe xan ttjé xan tsjin, para que icha sitticaon ra Jesucristo co para rrochonda ra iná vida naroaxin. <sup>3</sup> Nchehe ra jamé si jaha ra ndoa ditticaon ra que Dios ján jian.

### *Jesucristo inchin ná xo que jichon*

<sup>4</sup> Ditticaon ra Jesucristo icha co icha ixin jehe inchin ná xo que chonda vida. Janha ndattjo ra jañá ixin jehe inchin tti xo icha importante ngain esquiné nchia, co nchia mé rročo ningoe Dios. Chojni are saho ndačo na que xo jiji xonhi xé xo, pero para ixin Dios xo jiji anto jian xo co anto rentte xo. <sup>5</sup> Jaha ra cai inchin xo que chonda vida. Mexinxin dittoaxin ra que Dios sinttagonda ra para que de jaha ra Dios sinchechjian ná ningoe. Co cain jaha ra ná grupo de xidána jian para ixin Dios que de ixin Jesucristo jaha ra nchesayehe ra Dios ixin nchehe ra jian, co jehe Dios nchao sayé tti jaha ra nchehe ra. <sup>6</sup> Janha ndačhjan jañá ixin ndačo ngain tti jitaxin Palabré Dios:

Janha tsín ngain ciudad de Sión ná chojni que sehe inchin tti xo que nchegonda chojni para nchekhjian na esquiné ningona, pero xo mé ná xo que janha coinchiá co anto rentte xo mé.

Co cain chojni que ditticaon ngain xo mé, xonhi tiempo sinttechín na de ixin jehe xo mé.

<sup>7</sup> Jaha ra que ditticaon ra, noha ra que xo mé atto rentte xo; pero para ixin tti chojni que ditticaonha, diconhe inchin ndačo ngain tti jitaxin Palabré Dios are ndačo:

Tti xo que xialbanil ndačo que xonhi xé, pero xo mé xo icha importante de cain xo.

<sup>8</sup> Co cai tonhe inchin ndačo ngain tti jitaxin Palabré Dios are ndačo:

xo jiji tti tonttenguixin chojni, co tti jehe na xantjaxin na.

Ndoa jehe na tonttenguixin na ixin ditticaonha na tti jian joajna, ixin ojamé viquininxin na.

### *Tti chojni Dios*

<sup>9</sup> Pero jaha ra joxon chojni que Dios coinchiehe, jaha ra ná grupo de dana que nchesayehe Dios ixin mé tti rey; jaha ra ná nación jian, co jaha ra chojni Dios. Co jañá para que jaha ra rrondache ra icha chojni tti jian que nchehe Dios, tti vayaha jaha ra para sajoixin ra de ngain tti naxin xehe que vintte ra, para que jai te ra ngain tti anto chjoin jí joadingasán que jehe chonda. <sup>10</sup> Are icha saho jaha ra ni jaha chojni Dios vintte ra, pero jai jaha ra ochojni Dios ra; are icha saho jaha ra xonhi quensen vaquiaconoaha ra, pero jai Dios ttiaconoaha jaha ra.

*Dintte ra ninchehe xé Dios*

<sup>11</sup> Hermanos, jaha ra que teha ra ngain nacioan ra, nttatsanha ñao ra que xonhi tiempo dittoaxin ra nchehe ra tti jianha que xaxaon ni, ixin jehe mé tti ttetocaho almé ni. <sup>12</sup> Jaha ra nchehe ra jian ngayé cain chojni que xa ditticaonha Dios. Jamé jehe na, masqui nichja na jianha de ixin jaha ra jai, inchin rrocji ra chojni que joinchehe tsje cosa jianha, pero jehe na sicon na tti jian que jaha ra tenchehe ra, co are tsí nchanho que Dios sinchejuzgá ngain chojni, cottimeja nchoe jehe na rronichja na jian de ixin Dios.

<sup>13</sup> Ixin jaha ra rinao ra sinchesayehe ra Jesucristo, mexinxin ditticaon ra cai cain chojni que chonda joachaxin para ttetonha nttihi ngataha nontte, inchin tti ttetonha xiemperador que chonda icha jie joachaxin. <sup>14</sup> Co ditticaon ra cain tti rrondačo cain xigobernador que jehe xiemperador rroanha para sinchecastigá xa tti chojni que nchehe jianha co para sinchesayehe xa tti chojni que nchehe jian. <sup>15</sup> Ixin Dios rinao que jaha ra sinchehe ra jian, para que cain chojni que xonhi chonxin de ixin Dios co cain chojni que xonhi xé tti jehe xaxaon choha rronichja na jianha de ixin jaha ra.

<sup>16</sup> Janha rrindattjo ra ixin ditticaon ra cain chojni que chonda joachaxin para ttetonha nttihi ngataha nontte, pero masqui jamé, xaxaon ra ixin chonda ra libertad. Pero mé rrochoha que ixin jaha ra nchao sinchehe ra cosa jianha ixin chonda ra que sitticaon ra Dios ixin jaha ra chojni jehe. <sup>17</sup> Jaha ra chonda ra respeto ngain cain chojni. Rinao ra cain chojni que ditticaon Dios, chonda

ra que rroʒagonhe ra Dios, co chonda ra respeto ngain xiemperador.

*Tti anto tangui que conhe Jesucristo, mé ná ejemplo para ixin ján na*

<sup>18</sup> Jaha ra, ʒo nchehe ra ʒa ngain ná xinajni, chonda ra que sitticaon ra tti tsetonha ra xinajnia ra, co jamé sinchehe ra jeoha ngain xinajni que anto jian para ixin jaha ra, cai ngain xinajni que jeha jian. <sup>19</sup> Ixin mé ná cosa jian si jehe ni tsixinhi ni tti tangui que tsonhe ni masqui ʒonhi razón pero jeha ixin jehe ni rinao ni Dios. <sup>20</sup> Ixin si jaha ra nchehe ra canxion cosa jianha co mexinxin ntacastigaxin ra na, mé masqui tsixinha ra conixin paciencia pero jaha ra cjoé ra para tsonha ra jamé. Pero si jaha ra tenchehe ra jian co ʒa tenttacastigá ra na co jaha ra tettixinha ra conixin paciencia, jamé nchoe ján jian tenchehe ra ngattoxon con Dios. <sup>21</sup> Mexinxin para ixin jamé Dios coinchiaha jaha ra. Co cai Jesucristo anto tangui conhe para ixin jaha ra, para chjá ra ná ejemplo, para que jaha ra jamé sinchehe ra cai. <sup>22</sup> Jesucristo ni ná cosa jianha joincheha, co jehe ʒonhi tiempo joincheyehe ni ná chojni. <sup>23</sup> Co are icha chojni vanichja na jianha ngain jehe, jehe ʒonhi jianha vanichja ngain jehe na. Co are vancheguetan na Jesús tangui jehe vancheʒaonha na, sino que jehe chonhe para tti sinchehe Dios ixin Dios tti Juez que nchehe inchin jiquininxin ngain cainxin chojni. <sup>24</sup> Cainxin tti jianha que ján na nttoho na, Jesucristo ocjoenga hna are jehe vengano cruz; jehe conhe jamé para ján na vaʒhjexin na de ngain cosa jianha, para que jai te na ngain



cosa jian. Co jehe vicaon hasta conihí cuerpoe para que jointtaxingamaha jaha ra cai. <sup>25</sup> Are icha saho jaha ra vacji ra inchin tti coleco que diguichoe, pero jai ocjan ra ngain Jesucristo co jehe dicao cuidado de ixin jaha ra inchin ná tti ttingaria coleco co jehe dicao cuidado de ixin almá ra.

### 3

#### *Vida que rrochonda chojni que otottehe*

<sup>1</sup> Jamé cai jaha ra x̄o n̄chí ra are osinttecoho ra xixiha ra ditticaon ra tti tsetonha ra xa, para que si ttoha de xixiha ra x̄a ditticaonha xa joajné Jesucristo, jehe xa nchao sitticaon xa jehó conixin sicon xa tti jian que jaha ra sinchehe ra, co irrogondaha que jaha ra rrondache ra xa. <sup>2</sup> Ixin jehe xa osicon xa que čhihi xa chonda n̄cha respeto co nchehe n̄cha joxon jian. <sup>3</sup> Jaha ra x̄o ončhičhihi ná xí x̄axaonha ra de ixin quexén sinchehe ra para icha čhjoin sintte ngama cuerpoa ra, inchin tti sinchejinji já ra anto najni, o are tsín ra ngama cuerpoa ra cosa de joxon oro, o are sinttengaha ra vestido que anto čhjoin te. <sup>4</sup> Jaha ra dintte ra čhjoin pero de ngain ansean ra, co tti čhjoin de ngain ansean ra, mé x̄onhi tiempo tsjexin, co mé rročo que ansean ra anto nda co čhjoin tonohé, co jehe jihí anto rentte ngattoxon con Dios. <sup>5</sup> Ixin cai ngain tiempo vatto osé, cain n̄chí que vechonda confianza ngain Dios vanchehe n̄cha jamé, co cai vaguitticaon n̄cha tti vaquetonhe xixihi n̄cha. <sup>6</sup> Jamé joinchehe Sara cai; jehe vitticaon cain tti ndačo Abraham xixihi jehe Sara. Co Sara joincheguini jehe Abraham,

“soixin.” Jaha ra cai nchao sintte ra ngain vidá ra inchin jehe vehe ngain vidé si sinchehe ra jian co xonhi cosa rroxagonhe ra.

<sup>7</sup> Cai jaha ra, xo oxixihi ná nchí, chonda ra que rroxaxaon ra jian de ixin nchichiha ra. Co ttjihó ra respeto ngain ncha inchin jehe ncha jiquininxin ncha, jeoha ixin nchí icha sojiha ncha, sino cai ixin Dios chjé ncha iná vida naroaxin que xonhi tiempo tsjexin inchin chjá jaha ra. Nchehe ra cain jihi para que xonhi quehe rrocayacoen oracioan ra ngain Dios.

*Chojni que anto tangui tonhe por ixin nchehe tti jian*

<sup>8</sup> Jañá dintte jaha ra cain ra, ditticaon chó ra co ttiacaonehe chó ra naná ra, co rinao chó ra inchin rrocji ichó ra. Chjoin nichjehe ra cain chojni co xaxaonha ra ixin jaha ra anto jian ra. <sup>9</sup> Ncheha ra jianha ngain chojni que sinchehe jianha nganji ra, co nichjaha ra feo de ixin tti chojni que rronichja feo de ixin jaha ra, icha jian nchetsenhe ra ñao Dios para que Dios sinchenciaon ngain chojni mé, ixin Dios coinchiaha jaha ra para sinttanchaon ra.

<sup>10</sup> Ixin ndačo ngain tti jitaxin Palabré Dios:

Tti anto rinao vidé co rinao sehe chjoin cain nchanho de ngain vidé,  
chonda que sicao cuidado que rronichjaha cosa jianha,  
ni rronichjaha mentira.

<sup>11</sup> Chojni mé chonda que sachjenda de isincheha cain cosa jianha, co sinchehe jehó cosa jian; jehe tsjé quexen sinchehe para chjoin sehe ngain cain chojni, co cain tiempo jamé sinchehe.

<sup>12</sup> Ixin Dios jinda tti chojni que nchehe jian co jehe ttinhi cain tti ndačo na ngain jehe, pero cain tti chojni que nchehe jianha jehe toñaó ngain na.

<sup>13</sup> Űonhi chojni sinchehe jianha nganji ra si jaha ra cainxin tiempo sinchehe ra jian, <sup>14</sup> co masqui tangui tsonha ra ixin nchehe ra jian, pero jaha ra čhjoin tsonohe ansean ra. Űagoenha ra ni ná chojni ni Űonhi tiempo chonda ra joaŰaon, <sup>15</sup> sino que jaha ra nchesayehe ra Cristo ngain ansean ra ixin jehe tti chonda joachaxin para ixin ján na. Jaha ra cainxin tiempo dintte ra listo para sinchenohe ra quexeho chojni que sanchianguiha ra de ixin quedonda jaha ra anto chonda ra seguro que ixin jaha ra chonda ra iná vida naroaxin. Ndache ra na, pero jion conixin respeto. <sup>16</sup> Jaña nchehe ra joxon cosa jian para que cain tiempo tsonohe čhjoin ansean ra. Jamé cain chojni que nichja jianha de ixin tti jaha ra nchehe ra ixin ditticaon ra Cristo, jeho na tsosoé na de ixin tti jehe na nichja na. <sup>17</sup> Icha jian tsonoha ra tangui ixin sinchehe ra jian, si Dios jamé rinao, co naha ixin sinchehe ra jianha.

<sup>18</sup> Ixin Cristo mismo tangui conhe ndavenhe para cjoenga hna nacoa nttiha de ixin tti jianha que ján na nttoho na. Cristo jehe jian, pero jehe tangui conhe para ixin ján na Űo jianha na, para satsjinho na ngain Dios. Cuerpoe jehe ndavenhe cuerpo pero espiritue venha spiritu. <sup>19</sup> Co de ngain espiritue cjoí ngain infierno para joinichja ngain espiritue cain nindadiguenhe que te nttiha.

<sup>20</sup> Cain espíritu jìhi espíritue tti chojni que vaguitticaonha Dios ngain tiempoe Noé. Ngoixin tiempo que Noé joinchechjian arca, Dios chonhe para que icha chojni rroguitticaon na, pero jehò jni chojni tti xonhi conhe de ngain jinda ixin joixinhi na arca. <sup>21</sup> Co jinda mé rroçho tti jinda que ján na diguittexin na jai; de ixin jinda mé ján na ditjañá na cain tti jianha que jointtoho na. Are diguittexin na, jinda jeha tsinda cuerpoa na, sino que are mé ján na danchiehe na Dios que irrocjanha na sinttoho na jianha co jehe rrochjá na ná conciencia jian. Co Dios tsançhjandaha almá na tsji ngain infierno ixin Jesucristo xechonxin, <sup>22</sup> co jehe Jesucristo sacojín para ngajni co nttiha jí ngain lado jian de Dios co jehe tti chonda joachaxin para jittetonhe cain ángel co icha cosa que chonda joachaxin nttiha.

## 4

### *Sonttoho na inchin tti joachaxin que chjá na Dios*

<sup>1</sup> Mexinxin, inchin anto tangui conhe Jesucristo ngain cuerpoe, cai jaha ra chonda ra que dittoaxin ra para setan ra tangui. Ixin tti chojni que vetan tangui ngain cuerpoe ixin ditticaon Jesucristo, chojni mé incheha cosa jianha, <sup>2</sup> para que cain nchanho que sinttechon chojni mé jehe na sinchehe na inchin rinao Dios, co isincheha na tti jianha que jehe na xaxaon na. <sup>3</sup> Oatto tsje joinchehe ra ngain tiempo vatto, jaha ra vanchehe ra tti ncheçoxinhi cain chojni que ditticaonha Dios. Ngain tiempo mé jaha ra vinttechonda ra tsje vicio, vanchehe ra tti jianha que vaçaxaon ra,

co anto vacoan ra, co vaquín ra vandango para vacoanxin ra conixin icha chojni, co anto vaguihi ra cosa que coanxin chojni, co vanchesayehe ra ídolo que Dios ndačo jianha sinchesayehe ni cosa mé. <sup>4</sup> Co jai cain chojni mé ttinxinha na quedonda jaha ra icoancoha ra co ichjioha ra na ngain vida nchaoha mé, mexinxin nichja na jianha de ixin jaha ra. <sup>5</sup> Pero chojni mé chonda na que sanjo na cuenté na ngain Dios tti sinchejuzguehe cain chojni que xa techon conixin cain chojni que ondavenhe. <sup>6</sup> Ixin tti chojni que ondavenhe are xa vinttechon na, cjoí chojni joindačo joajné Dios ngain jehe na para que espiritue na nchao rroguinttechon jai inchin jichon Dios, masqui jehe na ndavintteguenhe na de ngataha nontte inchin cain chojni chonda que ndasenhe.

<sup>7</sup> Ochian joí tiempo que ndatsjexin cainxin cosa. Mexinxin jaha ra xaxaon ra jian co cainxin tiempo nichja ra ngain Dios. <sup>8</sup> Co tti icha rinaho janha, que jaha ra anto sinao chó ra cada ra ixin tti chojni que rinao icha chojni jehe nchao sinchetjañehe chojni que nchehe cosa jianha. <sup>9</sup> Dayehe ra jian tti chojni que siji nchiandoi ra co ndačoha ra ixin mé ná molestia para ixin jaha ra. <sup>10</sup> Cada ra Dios chjá ra naná clase de joachaxin para tsjenguijna chó ra. Co inchin ná tti nchehe jian ngain ná xa, jamé nchehe ra cai; nchegonda ra cain tti jian que ttixin de ngain Dios para ttjenguijna ra icha chojni. <sup>11</sup> Tti chojni que chonda joachaxin para nichja quehe rročo Palabré Dios ngain icha chojni, chonda que rronichja inchin jiquininxin. Co tti chojni que chonda joachaxin para tsjenguijna icha chojni,

que sinchehe jian de ngain ansén inchin joachaxin que Dios joanjo ngain jehe. Cain cosa jian que sinchehe ra, nchehe ra para tsoyaxin Dios de ixin tti joinchehe Jesucristo. Co Jesucristo jiquininxin que cain chojni sinchesayehe jehe co jiquininxin cain joachaxin para cainxin tiempo. Amén.

### *Tti tangui que tonhe chojni Jesucristo*

<sup>12</sup> Hermanos, dinttechinha ra are anto tangui tsonha ra ixin jamé tonhe cain chojni que ditticaon Jesucristo, para que Dios datsoan ngain ansén ni si seguro ditticaon ni Jesucristo ani nahi.

<sup>13</sup> Jaha ra icha jian chaha ra are tsonha ra tti anto tangui ixin chonda ra oportunidad de tsonha ra inchin conhe Jesucristo, para que cai anto rrochaha ra are sicon ra tsí Jesucristo iná inchin ngacjan tsje chiḡoe nchanho. <sup>14</sup> Si chojni nichja na feo nganji ra ixin ditticaon ra Jesucristo, jaha ra anto ḡjoin vidá ra ixin Espíritu Santo, que anto jian, jí nganji ra. Jehe na tenichja na jianha de ixin jehe Espíritu Santo jiji, pero jaha ra tenchesayehe ra. <sup>15</sup> Si ḡhoan de jaha ra tangui tetonha ra, pero que jeha ixin jaha ra nagoenxon ra iná chojni, o ni jeha ixin coehe ra cosé iná chojni, o ni jeha ixin joinchehe ra cosa jianha, o ni jeha ixin jaha ra joixintte ra problema de iná chojni, ixin cain mé anto joasoaxin para ixin jaha ra. <sup>16</sup> Pero si ḡhoan ra tangui tonha ra ixin dinhi ra cristiano, rroḡho ixin jaha ra ditticaon ra Jesucristo, jaha ra chondaha ra que tsosoaha ra, sino que danjo ra gracias ngain Dios de ixin jehe tti tangui que tsonha ra.

17 Ojoí tiempo que Dios tsexinhi sinchejuzgá ngain chojni jehe. Co si nganji ján na jittexinxin Dios jinchejuzgá, ¿mé quexén tsonhe are sinchejuzgá Dios ngain tti chojni que ditticaonha joajné Dios? 18 Si para chojni jian tangui sachá na iná vida naroaxin, ¿mé quexén tsonhe chojni jianha? 19 Mexinxin tti chojni que tonhe tangui ixin jamé rinao Dios, chojni mé chonda na que sinchehe na sigue de sinchehe na tti jian, co rrochonda na cainxin confianza ngain Dios que joinchechjian na ixin jehe Dios cainxin tiempo nchehe inchin ndačo.

## 5

### *Consejo para cain chojni que ditticaon Jesucristo*

1 Jai janha rrochjaha consejo nittetonha nganji ra ngain ningoa ra. Ixin cai janha chonda joachaxin inchin jehe na, co janha vicon cain tti anto tangui que conhe Jesucristo, co janha cai tsosayana inchin jehe na are Jesucristo tsí iná. 2 Nttatsanha ñao ra que inchin cuidado que dicao tti ttingaria coleco, jamé ttjiho ra cuidado de ixin chojni Dios, tti chojni que jaha ra chonda ra responsable de sinchecoehne ra na de ixin Dios. Nchecoehne ra na conixin ansean ra jian, inchin rinao Dios co jeha ixin afuerza chonda ra que sinchecoehne ra na, ni jeha ixin rinao ra sachá ra tomi. Nchehe ra xa jihi pero conixin ansean ra jian, 3 jeha inchin xinajni sintte ra para ngain chojni que sinchecoehne ra, sino nchehe ra jian cain nchanho para jamé sicon jehe na ná ejemplo. 4 Jamé sinchehe ra para que are tsí Jesucristo,

jaha ra sayehe ra ná premio anto jian, que xonhi tiempo ndatsjexin.

<sup>5</sup> Jamé jaha ra cai, xo xa tsjeha nano chonda ra, ditticaon ra tti ttetonha dačhichjan que chonda tsje nano. Cainxin ra chonda ra que sitticaon chó ra naná ra conixin jian ansean ra. Ixin ndačo ngain tti jitaxin Palabré Dios:

Dios toñao ngain chojni orgulloso,

pero jehe ttjenguijna tti chojni que xaxaonha ixin jehe chojni anto jian.

<sup>6</sup> Mexinxin dintteha ra orgulloso ngattoxon con Dios para que jehe sinttasayaha ra are jehe sinchejuzguehe ngoi mundo jihi. <sup>7</sup> Ndache ra Dios cainxin joachjaon que jaha ra chonda ra ixin jehe cain tiempo jinda ra.

<sup>8</sup> xaxaon ra jian cainxin tiempo co dintte ra listo ixin inchínji tti ningaconha ra rridehe xá ná coleón que anto jitoñao co rrittjé va chojni para nasoenson va. <sup>9</sup> Jaha ra sinttaxaonha ra inchínji, sino que dintte ra jian ngain tti jaha ra ditticaon ra ixin noa na que cainxin chojni que ditticaon Jesucristo ngoixin mundo tedetan na tangui inchin jaha ra. <sup>10</sup> Pero después que jaha ra setan ra tangui nchion tiempo, Dios sinttachjian jaha ra chojni jian que rrochondaha ni ná cosa jianha, co jehe sinttachjian jaha ra chojni soji co seguro de ngain tti ditticaon ra. Co xajeho Dios mé tti anto nttanchaon na jai, vayá na para que ján na sontte na tti jí glorié jehe para cainxin tiempo; ján na conixin Jesucristo. <sup>11</sup> Co jehe Dios tti jiquinxin para cainxin chojni sinchesayehe na jehe co



jehe tti rrochonda cainxin joachaxin para cainxin tiempo. Amén.

*Nttihi joexinxin joajné Pedro*

<sup>12</sup> Silvano, tti janha datsoan que jehe cainxin tiempo ditticaon Jesucristo, jehe tti cjin palabrana ngain carta jiji. Co ngain carta jiji janha rrich-jaha ra consejo co rrindattjo ra seguro que cain tti jian que jaha ra vayehe ra, mé tjagoa na ndoa que Dios rinao na ján na. Nchehe ra sigue ditticaon ra jiji cainxin tiempo.

<sup>13</sup> Cain chojni que ditticaon Jesucristo, nite ngain ciudad de Babilonia, tti ni Dios coinchiehe inchin coinchiaha jaha ra, cain chojni mé rroanha na joajna nganji ra. Co cai Marcos, tti rinaho inchin xanhna, jehe rroanha joajna nganji ra cai.

<sup>14</sup> Chjehe chó ra joajna jian inchin nchehe ra ngain xanchó ra.

Cainxin jaha ra xó ditticaon ra Jesucristo, Dios rrochjá ra tti chjoin que tsonohe ansean ra. Amén.

## **Tti jian joajné Jesucristo New Testament in Popoloca, San Marcos Tlalcoyalco**

copyright © 1982 Wycliffe Bible Translators, Inc.

Language: San Marcos Tlalcoyalco Popoloca (Popoloca, San Marcos Tlalcoyalco)

Translation by: Wycliffe Bible Translators, Inc.

Popoloca, Tlalcoyalco [pls], Mexico

### **Copyright Information**

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Popoloca, San Marcos Tlalcoyalco

**© 1982, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 11 Nov 2022 from source files  
dated 29 Jan 2022

a23ba35e-b016-5f67-a705-694e460cf18a